



UPA 2015/050  
12.maj 2014  
Kalistat Lund

**Nunatsinni tamani utoqqaat illuisa pilersaarusiordfigineqarnis-  
saanik siunnersuut apeqquteqaat aallavigalugu oqallittoqarnis-  
saanik siunnersuut tamatumuuna saqqummiuppara.**

(Inatsisartunut ilaasortaq Hans Enoksen, Partii Naleraq)

Utoqqaat illuinik inerisaanissat allatulluunniit utoqqartatsinnut inissatigut atugassaqtitsinissarput pillugu pilersaaruteqarluarnerusariaqarnermik noqqaaneq pisariaqartutut isigalugu siunnersuuteqartoq isumaqatigaarput.

Qularutiginngilarput komuunit sisamaasut tamarmik, utoqqaat ineqarnerisigut qanoq pisariaqartitsisoqarneranik pisariaqartitsisoqarumaarneranillu paasissutissanik pigisaqareersimassasut aammalu utoqqaat illuisa ullumikkut pigineqartut aserfallassimanermikkut qanoq innerinik paasissutissaqareersimassasoq.

Tamakku ilisimasat aallaavigalugit Kommuunit Namminersorlutillu Oqartutussat pilersaarusiaqartariaqarput ukiut aalaangersimasut iluanni, illoqarfinni nunaqarfinnilu tamani utoqqaat inissaqarnerisigut qanoq ineriartortitsisoqassanersoq qanorlu tulleriarisoqassanersoq.

Ukiut aalajangersimasut iluanni siunnerfilimmik ineriartortitsisoqartariaqarnera pingaartutut isigaarput. Akileraarutitigut aqqissuuseqqissinnaannerit kommunillu akornanni aningaasatigut qanoq nalimmassaariaaseqarnissat ilaatsigut siunertaqartariaqarput meerartatta atuartitaanerannut utoqqartattalu atugassarissaarnerullutik inuunnissaannut tunngasunik. Aalajangersimasumik sinaakkutassamik aalajangersaasoqanngippat siunertap tamatta pingaartitatta qaanngiataarneqaratarsinnaanera pisinnaammat.

Inuiaqatigiit maanni nunaqartugut, utoqqarnut inissianik pisariaqartitsinerput annertuvoq. Tamanna ilaatsigut aallaaveqarpoq illoqariaaseqarnitta maanni nunatsinni qanoq atugassaqarfiuneranik. Amerlaqaat pisortat inissiaataanni attartukkani najugaqartuarsimallutik utoqqalinerminni allamik periarfissaqanngitsut, inissiammi nalinginnaasumik utoqqalingaatsiarfissatut piukkunnarsagaaneq ajormata.

Ukiuni aggersuni pilersaarusiornissanut atasumik suliaqarnissani aqutissiuunniarneqartariaqarpoq siunissami utoqqaat namminneq angerlarsimaffimminni najugaqaannarsinnaannerisa sivisunerpaaffianiitsinnissaa qanoq anguniarneqassanersoq.

Isumaqarpugut inuiaqatigiinni nammineq pigisamik illutaarsinnaannerup orniginartumik periarfissiuunneqarnissaa pisariaqavissoq. Pisortammi inissianik attartortitsisarfiuteqarnerat nalinginnaasutut isigineqariartuaartariaqanngilaq. Nalinginnaannerpaaq tassaasariaqarmat inuit namminneq illuminni aamma utoqqaliffigisinnaassaminni najugaqartarnissaat.

Angerlarsimaffimminni Utoqqalisunut ikiorteqartarnerup pisariaqartitsinermut malinnaatinneqarnissaa pingaartinneqartariaqarpoq. Minnerunngitsumik aamma nunaqarfinni amerlasuuni utoqqalisunut atugassarititaasut imaannaanngitsumik inissimasut ilisimavarput. Utoqqarnut ikiortitut sulinerup orniginartuunissaa pingaartillugu aqqinneqartariaqarpoq, ilinniartitaanikkut atugassarisitaasutigullu. Angerlarsimaffimmi utoqqalisinnaaneq utoqqarnut orniginarnersaammat periarfissaqarfiisigut ajornaallisaavigisariaqarpoq.

Siunissami pilersarusiortarnissani eqqumaffigineqarnerusariaqarpoq innarluutilittatsinnut najugaqartitsisarnitta aaqqiivigineqartariaqarnera.

Neriutigaarput manna oqallinneq sunniuteqassasoq utoqqalinermi najugaqarfitsigut atugassarititaassut pitsaanerulernerannik.